

Calasetta. Atopu de paricius professoris po sa defensa de sa limba tabarchina

## «Sa nostra puru est un'identidadi»

Is propostas de Tanda, Dettori, Vignuzzi, Toso e Orioles

Fiant in medas is strangius, sàbudu passau in sa scola de Calasetta: Ugo Vignuzzi, professori de dialettologia in s'Universitàdi «La Sapienza» de Roma; Fiorenzo Toso, specialista de linguistica tabarchina; Vincenzo Orioles, ghiadori de su centru internazional de plurilinguismu de Udine; Maria Antonietta Dettori, de s'Universitàdi de Casteddu; Nicola Tanda, Patrizia Bertini Malarini e Gianni Lupinu de s'Universitàdi de Sassari.

Argumentu: unu progetu de imparu de su tabarchinu in is scolas de Calasetta. Dd'ant presentau su présidi de sa scola media Efis Piras e su professori Luisu Rivano (chi

dd'at apariciu), nd'ant chistionau sa professoressa Maria Cabras, su présidi de Carloforte Norino Strina e s'assessori Peppi Leinardi.

Genti meda, scurtendu. Sa proposta chi nd'est bessia a pillu est custa: si conenti sa realtadi tabarchina est un'identidadi a prus boxis costruia in-d-una storia chi tenit prus de cinqu séculus e possedit un'arrichesa manna de festas, de cantus, òberas teatralis e literarias, est unu doveri su de dda tenni in contu, non feti po dda sarvai ma po ddi podi donai prus valori puru.

Beru chi sa lei regionali 26 -chi difendit sa limba e sa cultura sar-

da- at inclùdiu su tabarchinu puru in is variantis de defenzai. Ma est beru ateretantu chi sa lei aprova da de su Parlamentu italianu, in su mesi de Donniassantu de ocannu passau, asuba de is limbas de is minorias, ne at tentu perunu contu de su tabarchinu.

De comentis fai po chi custa sien da bengat difendia de sa lei nazional puru, e non solu de sa lei regionali 26, s'est chistionau in s'atopu de Calasetta.

«Una sociedadadi non podit essi moderna ne forti chi non connesscit is arrexinis suas in profundadi, cun totu su chi bolit nai custa connoscentzia», at nau su profes-

sori Nicola Tanda, chi de paricius annus est impegnau in totu sa Sardinia po garantiri a totu is minorias -sardas, ma in su pròpiu tempus de de totu su mundu- su dirittu de totus is àteras culturas.

Su tabarchinu, po chini no ddu scit, est sa limba fueddada de un'arèi de genti de sa Liguria (de Genova e de Pegli) chi in su 1450 si fut istabilia in s'isuledda de Tabarka, in s'oru de sa costa de sa Tunisia: piscadoris de coraddu, in parti manna. A sa genti de sa Liguria si fut aciunta àtera genti de àteras terras puru: Piemonti, Sardinia, Campania, Sicilia, chenza contai sa genti africana.